

Mennta- og menningarmálaráðherra og iðnaðarráðherra annars vegar og Fjórðungssamband Vestfirðinga hins vegar fyrir hönd eftirtalinna sveitarfélaga á Vestfjörðum: Árneshrepps, Bolungarvíkurkaupstaðar, Ísafjarðarbæjar, Kaldrananeshrepps, Reykhólahrepps, Strandabyggðar, Súðavíkurhrepps, Tálknafjarðarhrepps og Vesturbyggðar, gera með sér svofelldan

SAMNING

um samstarf ríkis og sveitarfélaga á Vestfjörðum um menningarmál svo sem nánar greinir í samningi þessum.

1. gr.

Markmið

Tilgangur samningsins er að efla menningarstarf á Vestfjörðum og beina stuðningi ríkis og sveitarfélaga í Fjórðungssambandi Vestfirðinga við slíkt starf í einn farveg. Jafnframt er með samningi þessum stefnt að því að tryggja sem best frumkvæði og áhrif sveitarfélaganna við forgangsröðun verkefna og auka samstarf þeirra við framkvæmd og stefnumótun menningarmála í landshlutanum.

2. gr.

Menningarráð Vestfjarða

Sveitarfélögin á Vestfjörðum standa að Menningarráði Vestfjarða í samræmi við gildandi samstarfssamning sveitarfélaganna.

Menningarráð Vestfjarða er samstarfsvettvangur sveitarfélaga á Vestfjörðum fyrir menningarmál og hefur meðal annars það hlutverk að vinna samkvæmt stefnumótun um menningarmál fyrir landshlutann, standa fyrir öflugum þróunarstarfi í menningarmálum og menningartengdri ferðaþjónustu, úthluta fjármagni til menningarverkefna á Vestfjörðum samkvæmt úthlutunarreglum sem ráðið setur samkvæmt ákvæðum samningsins og hafa eftirlit með framkvæmd hans. Menningarráðið skal jafnframt hafa frumkvæði að auknu samstarfi í menningarmálum og á sviði menningartengdrar ferðaþjónustu.

Menningarráð skal skipað fimm fulltrúum og jafnmörgum til vara, á grundvelli samstarfssamnings sveitarfélaganna sem að samningi þessum standa. Skulu þeir þekkja vel til menningarstarfs innan landshlutans.

Kostnaður við starfsemi ráðsins, m.a. vegna aðstöðu og menningarfulltrúa, skal greiddur af því fé sem veitt er til að efna samning þennan. Menningarráðið ræður menningarfulltrúa í amk. hálfu starf og setur honum erindisbréf.

3. gr.
Framlag ríkisins

Stuðningur ríkisins, f.h. ríkissjóðs við menningarstarf og samstarf sveitarfélaga á Vestfjörðum samkvæmt samningi þessum er tvíþættur:

- a. Veitt er fé til einstakra verkefna, sbr. 5. gr.
- b. Veitt er móttframlag til reksturs Menningarráðsins að hámarki fimmtíu hundraðshlutum, sbr. 2. gr.

Mennta- og menningarmálaráðuneyti og iðnaðarráðuneyti veita samtals 26 m.kr. árið 2010 til samstarfsins, þar af greiðir mennta- og menningarmálaráðuneyti 20 m.kr. og iðnaðarráðuneyti 6 m.kr. Af þessu framlagi er heimilt að verja 6 m.kr. til starfsemi Menningarráðs og menningarfulltrúa enda sé hann í fullu starfi.

Greiðslur samkvæmt þessari grein taka hvorki til greiðslna til byggðasafna, náttúruminjasafna eða listasafna á grundvelli safnalaga nr. 106/2001 né til héraðsskjalasafna á grundvelli laga um Þjóðskjalasafn Íslands nr. 66/1985 með síðari breytingum. Samningur þessi nær ekki til annarra framlaga ríkisins á fjárlögum. Framlög til stofnstyrkja eru ekki hluti af samningi þessum og skal um slíka styrki semja sérstaklega milli aðila.

4. gr.
Framlög sveitarfélaga

Sveitarfélögin skulu vinna að því að auka ráðstöfunarfé Menningarráðs Vestfjarða hvort heldur er með framlögum frá einkaaðilum eða með eigin framlögum. Árið 2010 skal framlag sveitarfélaganna nema 25 hundraðshlutum af þeirri heildarfjárhæð sem veitt er til verkefnastyrkja.

Sveitarfélögin skulu greiða að lágmarki helming kostnaðar vegna starfsemi Menningarráðs Vestfjarða, þ.m.t. skrifstofuhald og laun árið 2010.

Sveitarfélögin á Vestfjörðum beita sér fyrir því að heildarframlög þeirra til menningarmála verði að lágmarki 85 m.kr. árið 2010.

5. gr.
Meðferð styrkumsókna

Menningarráð Vestfjarða skal opinberlega auglýsa eftir umsóknum um styrki. Ráðið úthlutar fjármagni til menningarverkefna á Vestfjörðum á grundvelli umsókna og gerir skriflega samninga um skyldur styrkhafa vegna þeirra verkefna sem hljóta styrk. Í samningum skulu koma fram markmið verkefna og hvaða mælikvarðar verða lagðir til grundvallar þegar árangur er metinn. Upplýsingar um framkvæmd verkefna skulu birtar á vefsvæði Menningarráðs.

Taka skal m.a. mið af eftirfarandi við afgreiðslu umsókna.

1. Efla samstarf á sviði menningarmála á svæðinu.
2. Efla nýsköpun í verkefnum tengdum menningu.
3. Atvinnutækifærum fjölgi á menningarsvæðinu.
4. Styðja við menningartengda ferðaþjónustu.

6. gr.

Aðrir styrkir

Samningur þessi kemur ekki í veg fyrir að menningarstofnanir, félög og einstaklingar sem njóta styrkja á grundvelli þessa samnings sækji um styrki til opinberra sjóða á menningarsviðinu.

7. gr.

Ársskýrsla

Menningarráð Vestfjarða skal fyrir lok marsmánaðar 2011 senda ráðuneytunum ársreikning ásamt skýrslu um framkvæmd samningsins þar sem m.a. er gerð grein fyrir skiptingu framlaga samkvæmt samningi þessum, hvernig sveitarfélögin hafi staðið við skuldbindingar sínar gagnvart samningnum, ásamt því sem árangur verkefna sem hlutu styrk er metinn.

Menningarráðið skal senda ráðuneytunum stutta greinargerð um þær breytingar sem orðið hafa á starfsemi Menningarráðsins á árinu 2010 frá framkvæmd fyrri samnings fyrir septemberlok.

8. gr.

Uppsögn og endurskoðun

Telji annar samningsaðili að hinn uppfylli ekki samningsbundnar skyldur sínar getur hann gert skriflega kröfu um að úr því verði bætt innan hóflegs frests. Sé ekki bætt úr annmörkum á framkvæmd samningsins getur samningsaðili sagt samningnum upp með 6 mánaða fyrirvara.

Samningsaðilar geta óskað eftir endurskoðun á einstökum ákvæðum samnings þessa á samningstímabilinu, ef sérstakt tilefni gefst.

9. gr.

Gildistími

Samningur þessi tekur gildi við undirritun og gildir til ársloka 2010. Á árinu 2010 skulu samningsaðilar skoða forsendur fyrir frekara samstarfi og skal þeirri vinnu vera lokið fyrir 1. september. Í því skyni skal m.a. notast við fyrirliggjandi árangursmat.

10. gr.

Lögsaga

Leysi samningsaðilar ekki ágreiningsmál sem rísa kann vegna samnings þessa skal það rekið fyrir Héraðsdómi Vestfjarða.

Samningur þessi er gerður í þremur samhljóða eintökum og heldur hver aðili sínu eintaki.

Framangreindu til staðfestu eru undirskriftir aðila.

9. ágúst 2010

F.h. mennta- og menningarmálaráðuneytis

F.h. iðnaðarráðuneytis

Katrín Jakobsdóttir
mennta- og menningarmálaráðherra

Katrín Júlíusdóttir
iðnaðarráðherra

F.h. sveitarfélaganna í Fjórðungs-
sambandi Vestfirðinga

Anna Guðrún Edvardsdóttir
formaður